

■ TRIBUNA POLITICA

Grondas iertas: 20% per l'AVS!

DA SILVA SEMADENI,
CUSSEGLIERA NAZIUNALA

Quantas nunvardads chattainsa ozendi en la propaganda da votaziuns! La polemica da l'uniun d'artisanadi e mastergn per la revisiun da la lescha da radio e televisiun (LRTV) è mo in exempel latiers. Dentant savain nus: La LRTV revedida vul sulettamain introducir in nov sistem da taxas. Oz san ins tadar radio e guardar televisiun sin mintga telefonin e computer, e quai dapertut ed adina, pia er senza apparat classic da radio u televisiun. Ina midada da l'urden da taxas è uschia indispensabla – e pir da dretg anc pli bunmartgada: Tut las chasadas pajan en l'avegnir damain taxas e 75% da las interpresas insumma nagut pli! In gea a la revisiun da la LRTV è giavischà, er per che la SSR e las staziuns privatas da radio e televisiun possian garantir vinvant en tut las linguas naziunalas in service public uschè equilibrà sco pussivel. Gist per las minoritads linguisticas pitschnas è quai existenzial.

Anc mender èn las nunvardads en connex cun l'iniziativa per ina tazaziun moderada da las

iertas sur dus milliuns francs! Er qua: En nundumbraivels inserats e chartas da lecturs derasan ils adversaris penetrantamain sffilas orchestradas. Qua poss jau sulettamain dir: Na, i n'è betg vair che interpresas da famiglia ston patir! En il text d'iniziativa stat scrit cler e net che la taglia sin l'ierta na dastgia betg periclitur lur avegnir e las plazzas da lavur. Imports libers avunda auts e tariffas da taglia basas vegnan a preservar las interpresas da famiglia. Ils detagls vegn ad elavurar il parlament suenter l'accezaziun da l'iniziativa. Ed en il parlament vul nagin, gnanc la sanestra, donnegiar las interpresas pitschnas mesaunas (IPM). La taglia sin l'ierta da 20% pertutga mo quella part d'ina gronda ierta che surpassa ils dus miu. francs. Betg suttamess a la taglia è sper l'import liber da dus miu. francs er la part da la ierta per il conjugal ed instituziuns liberadas da la taglia. Per las IPM e per ils manaschis agriculs vegnan a valair autras reglas avantagiusas. Noss departament da finanzas ha publitgà quants Grischuns ch'i pertutga: Gnanc dus pertschient da la populaziun!

Il retgav va per in terz als chantuns, uschia che quels na restan betg cun mauns vids! Il pli blier profitescha dentant l'AVS. La taglia sin l'ierta porta almain duas milliardas francs en la cassa da l'AVS. E l'AVS dovra urgentamain dapli entradas. Perquai è ina taglia sin l'ierta onesta tar grondas iertas buna per l'AVS e buna per tuts, era per las IPM! Ella reducescha ils basegns tar autras funtaunas da finanziaziun sco ils procentes da paja u da la taglia sin la plivalur.

L'interprendider Michael Derrer di, sco pli baud gia il cusseglier federal Kaspar Villiger, che l'accumulaziun na franada da facultads gigantas sutmineschia l'economia da martgà. El ha fundà perquai in comité liberal che s'engascha per l'iniziativa da la taglia sin l'ierta! Ertar na pretenda betg in'atgna prestaziun, ertar è ina dumonda dal cletg. Uschia vesan quai er ils frars Meili da Turitg. Lur bab, l'interprendider ed inventader da l'indriz d'alarm d'incendi Cerberus, ha procurà ad els ina gronda ierta. Renconuschents per quest regal sustegnan els l'iniziativa. Parter l'agen cletg cun auters fa pli ventiraivel!